



**АКАФИСТ И ЖИТИЕ  
СВЯТОГО М҃ЧЕНИКА  
ТРИФОНА**






АКАФИСТ И ЖИТИЕ  
СВЯТОГО МУЧЕНИКА  
ТРИФОНА

Во славу Святей  
Матери Церкви!

От всего сердца  
поздравляем с этим  
светлым праздником Пасхи  
Желаем всех благ  
земных, для достигших  
благ небесных!





**АКАФИСТ И ЖИТИЕ  
СВЯТОМУ МУЧЕНИКУ  
ТРИФОНУ**



**СРЕТЕНСКИЙ МОНАСТЫРЬ  
•НОВАЯ КНИГА•  
•КОВЧЕГ•**

**ПО БЛАГОСЛОВЕНИЮ  
СВЯТЕЙШЕГО ПАТРИАРХА  
МОСКОВСКОГО И ВСЕЯ РУСИ  
АЛЕКСИЯ II**

**Акафист и житие святому мученику Трифону. М.: Сретенский монастырь; «Новая книга»; «Ковчег», 1998. 48 с.**

Лицензия ЛР № 063930 от 09.03.95  
Тираж 50000 (1-й завод 25000) экз.  
Тел. издательства: (095) 362-43-43.  
Отпечатано с готовых диапозитивов  
в типографии издательства «Пресса»  
Заказ № 2490.

ISBN 5-7850-0074-1

© Набор, верстка, оформление «Ковчег», 1998



## АКАФИСТ СВЯТОМУ МУЧЕНИКУ ТРИФОНУ

### *Кондак 1*

Избранный от Бога и к лику  
святых сопричтенный, святой  
мучениче Трифоне! Молися о нас,  
грешных, Владыце Христу и по-  
могай нам побеждати мир, плоть  
и диавола, многообразно вою-  
ющие на ны, якоже победил еси их

благодатию и силою возлюбленного тобою Христа, да, избавльшися от врагов наших видимых и невидимых, благодарственно воззовем ти: Радуйся, Трифоне, скорый помощниче всем, с верою и любовью к тебе притекающим!

### *Икос 1*

Образу благочестия родителей твоих подражая, христианския нравы от лет малых приял еси, святой мучениче, и мал сый лёты, стар же разумом, воистину христианин совершен явился еси. Мы же, воспоминающе добродетельное житие твое, восхваляем тя сице: Радуйся, добронравных



родителей благочестивый сыне;  
радуйся, великое их утешение.  
Радуйся, Ангела твоего Храни-  
теля непрестанное веселие; ра-  
дуйся, от юности твоея всего се-  
бе Богу предавый. Радуйся, от  
юности Христа возлюбивый;  
радуйся, от малых лет благодать  
Божію обильно стяжавый. Ра-  
дуйся, душу свою непорочну яви-  
вый; радуйся, себе самаго в храм  
Духа Святаго уготовавый. Ра-  
дуйся, отроком образ житія свя-  
таго показавый; радуйся, бла-  
гочестіем твоим верныя воз-  
веселяяй. Радуйся, от малых лет  
за вся сія Богом возлюблен-  
ный. Радуйся, Трифоне, скорый

помощниче всем, с верою и любовью к тебе притекающим.

### *Кондак 2*

Видя Господь, яко волею по стези благочестия, в немже от родителей твоих наставлен был еси, течеши, и яко воистинну любиши Бога, сотвори тя в жилище Святаго Духа от лет малых и отверзе уста твоя пети Ему: Аллилуиа.

### *Икос 2*

Силу веры твоея показуя, Владыка Христос дарова тебе, святой мучениче, еще отроку бывшу, дар чудотворений, сего ради вопием ти: Радуйся, от малых лет совершенную любовь к Богу по-

казавый; радуйся, заповедей Его не токмо слышатель, но и делатель от младенчества бывый. Радуйся, от юности твоея добродетели христианския стяжавый; радуйся, от малых лет житием, верою и любовию твоею Богу угодивый. Радуйся, дар исцелений от Него приявый; радуйся, дар той на пользу ближним издывающий. Радуйся, многоразличныя болезни исцеляющий; радуйся, в недугех облегчение дарующий. Радуйся, страдания в радость обращающий; радуйся, исцеления сия во славу Божию совершающий. Радуйся, теми истину веры православныя пока-

зующий; радуйся, теми нас к сла-  
вословию Бога возбуждающий.  
Радуйся, Трифоне, скорый по-  
мощниче всем, с верою и любо-  
вию к тебе притекающим.

### *Кондак 3*

Верою и любовью стяжал еси  
от Бога власть изгоняти духи не-  
чистыя, мучащия человеки и  
претящия им воспевати Богу:  
Аллилуиа.

### *Икос 3*

Видя дарованную ти, святой  
мучениче, силу Божию, вспять  
бежаша демони, имиже одержи-  
ми бяху бесноватии людие. Видя-  
щий же сия, воспеваху ти сице:

Радуйся, от Бога власть на нечистых духи приявый; радуйся, силою Божиею сих изгоняющий. Радуйся, врагу человеческому вредити людем возбраняющий; радуйся, козни диавола и ангелов его разрушающий. Радуйся, силу их низлагающий; радуйся, безсилье их являющий. Радуйся, страхом и трепетом их поражающий; радуйся, веры Христовы силу показующий. Радуйся, верных к прославлению Бога воздвигающий; радуйся, в бедѣх и скорбех сущих прибегати к предстательству святых наставляющий. Радуйся, в нуждах наших обращаться к Богу научающий; радуйся,

помощниче наш, Богом нам дарованный. Радуйся, Трифоне, скорый помощниче всем, с верою и любовью к тебе притекающим.

#### *Кондак 4*

Восхотев тобою обратити языки от пути нечестия и открыти им путь истинный, ведущий в Живот Вечный, си есть веру истинную, веру православную, даже до Рима из Компсады приведé тя Господь, да и в чертогах царских проповéси Бога и тамо многия научиши пети Ему: Аллилуиа.

#### *Икос 4*

Хотяй обратити многия на путь спасения, попусти Господь

демону вселиться в дочь цареву, и жестоко мучити и ввергати ю многочастне во огонь и воду. Вр́ачеве ничтоже успеваху и ничимже страдания дочери царевой утолити возмогоша. Егда же и сильнии мира сего и всякую врачебную хитрость вѣдущии ничтоже возмогоша и исповедаху немощь свою, тогда велением Божиим проглагола диавол, яко един есть, иже изгнати его имать, и се есть Трифон. Тогда прилежно искаху и обретоша его в Компсаде. Грядущу же ему и еще далече от Рима сущу, возопи гласом велиим диавол и изыде, и исцеле



девица. Видящий сия дивляхуся и глаголаху: Радуйся, Трифоне, еще далече сущий в бегство диавола обративый; радуйся, яко диавол безсилие свое пред тобою исповеда. Радуйся, молящимся тебе скорый помощниче; радуйся, недугов силою Божию целителю. Радуйся, оставленных врачами на свои рuce приемлющий; радуйся, печали на радость пременяющий. Радуйся, печальным утешение и скорбящим радование посылающий. Радуйся, Трифоне, скорый помощниче всем, с верою и любовью к тебе притекающим.



### *Кондак 5*

Видеша вернии, иже в Риме, чудо, пришествием твоим бывшее, укрепишася в вере своей и воспеша Богу, победившему адскаго змия и дарующему верующим в Него таковую силу: Аллилуиа.

### *Икос 5*

Уверения ища, тебе пришедшу в Рим, святыи Трифон, яко ты еси той, егоже убояся демон, моли тя император Гордиан, да явиши и ему и синклиту его, и людем в чувственном виде диавола, и не отреклся еси, но, возложив на ся пост, помолися Господу дний шесть. В день же сед-

мый, пришедшим царю, синклиту и людям, возопил еси: «Тебе глаголю, дѹше нечистый, во имя Господа моего Иисуса Христа явися семо и покажи свой демонский образ zde сущим, и безсиліе свое исповеждь...». И бысть тако. И зряху вси безобразіе демонское и дивляхуся вере святаго, вопиюще: Радуйся, Трифоне, егоже демони ослушати не могут; радуйся, Трифоне, по егоже велению дуси нечистии в телеснем виде являються. Радуйся, Трифоне, силою Божіею повелый диаволу исповедати, яко на христианы, иже святую православную и апостольскую веру

содержат, власти не имать; радуйся, Трифоне, емуже возвещено бысть, яко демони власть имут мучити токмо тех, иже своим похотем греховным следуют и дела, угодная диаволу, творят. Радуйся, Трифоне, яко научил еси нас бегати языческаго нечестия; радуйся, Трифоне, яко навчаеши всех бегати всякаго греха, в добродетелех же подвизатися. Радуйся, веру православную твердо содержати наставляя нас; радуйся, хотящим благочестно жити помогая. Радуйся, Трифоне, скорый помощниче всем, с верою и любовию к тебе притекающим.

## *Кондак 6*

Видевше, како младо отроча повелевает властно духовом злобы поднебесной, убояхуся мнози, и слышаще от демона и видяще воочию, яковú силу имать вера Христова, обратишася к Богу: нечестие же и прочая заблуждения своя отложше, крестишася и усты своими от сердца чиста благодарственно воспеша Богу песнь: Аллилуиа.

## *Икос 6*

Благодаряще тя, царь вложи в руце твои, мучениче, дары и злато, ты же, Христа Бога приобре-  
вый, ни во чтоже вменил еси вся,

яже в мире сем яко блага почитаются, и приял еси дары царевы, да послужиши сими ближним твоим, и шед во отечество твое Компсиду, дал еси вся нищим, сирым и всем в нужде сущим, непрестанно памятуя, яко расточив богатство земное, тленное, собереши себе на Небеси богатство нетленное, вечное. Мы же, научаемии тобою такожде творити, вопием ти сице: Радуйся, Трифоне, душу свою чужду сребролюбия показавый; радуйся, милосердие души твоея выну являяй. Радуйся, нищих питатель бывый; радуйся, неимущим сострадание показавый. Радуйся, заповедь Христа «Прося-

щему у тебе дай» исполнивый; радуйся, и нас исполняти заповеди Божии научивый. Радуйся, якоже шествием в Рим и возвращением своим в Компсаду многих утешивый, ободривый и возвеселивый; радуйся, показавый нам образ, како богатством гибнущим на земли негиблющее богатство на Небеси собирати. Радуйся, ближним служити нас научающий; радуйся, ближних любить нас наставляющий. Радуйся, образ жития праведнаго нам показующий; радуйся, яко правило веры в Бога, надежды на Него, любви к Нему и ближним и прочих христианских добродетелей яви нам собою.

Радуйся, Трифоне, скорый помощниче всем, с верою и любовью к тебе притекающим.

### *Кондак 7*

Взыде на престол римский нечестивый царь Дёкий, и пролияся по вселенней кровь христианская. Приблизися время, егда и тебе, святой мучениче, суди Господь подъяти страдания, да кровию и мученичеством своим запечатлеши веру и великую свою любовь к Богу и тем до конца низлóжиши сопротивныя силы и наставиши многих, да грядут на мучения, радующесе, якоже и ты, страсто-терпче, и поюще Богу: Аллилуиа.



## Икос 7

Яко укрытися не может град  
верху горы стояй, тако и тебе,  
святый мучениче, гонению от Де-  
кия царя на христиан бывшу, не-  
возможно бысть укрытися от му-  
чителей, ибо ты, яве без страха  
Христа всем исповедав, силою  
слова обращение многих ко  
Христу устроил и многия в неду-  
зех именем Его исцелил еси. Уве-  
девше же о тебе, святой Трифо-  
не, игёмон Аквилин, взя тя и пред  
судищем постави, ты же вся гря-  
дущая на тя в руце Бога твоего  
предал еси, радуясь яко и тя спо-  
доби Господь быти общника  
страданий его, и вернии, видяще



ревность твою по Бозе, вопияху  
ти: Радуйся, Трифоне, ко спасе-  
нию многих приведый; радуйся,  
многих от зловерия к вере истин-  
ней, православней обративый.  
Радуйся, чудесы твоими, силою  
Божиею содеянными, в вере, ими  
воспристой, их утвердивый; ра-  
дуйся, яко действенная вера твоя  
в Бога выну всем по всей вселен-  
ней явися. Радуйся, безмездный  
врачу, силою Божиею, якоже  
древле, такожде и ныне всякую  
болезнь скоро врачующий; ра-  
дуйся, надеждо оставленных вра-  
чами. Радуйся, скорое утешение  
болящих, на тебя надеясь, с мо-  
литвою прибегающих; радуйся,

небоязненно проповедавый Христову веру. Радуйся, от неверных за проповедь Христа Бога на мучение ятый; радуйся, не уstraшивыйся грядущаго мучения. Радуйся, научающий нас не бояться человеческих прещений; радуйся, во всем на Бога упование возложивый. Радуйся, Трифоне, скорый помощниче всем, с верою и любовию к тебе притекающим.

### *Кондак 8*

Услышав, яко ищут тя воины, не утаился еси от них, мучениче, ни в горах, ни в пустынях, но, огрaдився молитвою и крестом дерзновенно себе предал еси в

руце мучителей и с радостию великою стопы твоя направил в Никею, да возвестиши всем веру истинную и наставиши пети Богу: Аллилуиа.

### *Икос 8*

Егда вступи ты игемон на судилище: «Кто еси, кая судьба твоя, и како веруеши?» ты, не обинуюся, отвещал еси ему сице: «Трифон имя мое; отечество — Компсада; судьбы же несть у нас, зане веруем, яко вся Промыслом Божиим бывают. По вере же — христианин есмь, Христос же есть и моя сила, и моя крепость, и слава, и радость

моя». Сие исповедание твое слышаще, ублажаем тя, святой Трифоне, сице: Радуйся, неправедному судилищу дерзновенно представый; радуйся, верующих в Промысл Божий укрепляй. Радуйся, люди, живот свой судьбе вверяющия, посрамляй; радуйся, научаяй нас во всем упование наше на Бога возлагати. Радуйся, выну себе быти служителя Христова исповедуяй; радуйся, исповеданием тем веселие верным даруяй. Радуйся, соборища нечестивых исповеданием святым отлучивыйся; радуйся, грядущих мучений за нечестивых исповедание истин-

наго Бога не утрашивыйся. Радуйся, истину единую, Божественную возлюбивый; радуйся, лжи и отца ея, диавола, отвергыйся. Радуйся, Христа своим упованием именуяй; радуйся, Его своею крепостию нарицаая. Радуйся, Трифоне, скорый помощниче всем, с верою и любовию к тебе притекающим.

### *Кондак 9*

Слышавше твое исповедание, ярости исполнишася нечестивии и прещаху ти ранами и мучением. Ты же, мучениче Трифоне, подъятие страданий за Христа веселием почитая,

взывал еси немолчно Богу  
песнь: Аллилуиа.

### *Икос 9*

Ветия многовещанный Аквилин, видя, яко ты не убоялся еси прещений лютых, яко овча кроткое явился, ища прельстити ты словесы ласкательными, но, ничтоже успевая, паки в волка лютаго обращаешь, усугубляше прещения своя. Ты же тверд и непоколебим пребыл еси благодатию Божиею, воздвизая верных возглашати тебе сицевая: Радуйся, прещений лютых не убоявшийся; радуйся, смерти телесной не утрашившийся. Ра-

дуйся, душу свою за веру православленную положить не отрекшийся; радуйся, разум совершенный в том положительный, да сохраниши веру истинную во Единого Бога. Радуйся, не к земней, но к Небесней мудрости устремивыйся; радуйся, игемону, врагу твоему, спасения желавый. Радуйся, к познанию истинного Бога привести мучителя твоего тщавшийся; радуйся, проповедниче Христов сладкогласный. Радуйся, христианине, Христом возлюбленный; радуйся, волею на страдания шедый. Радуйся, мучений тех за Христа, яко сокровища, хоте-



вый; радуйся, во время мучений  
лютых Божественным светом  
осиянный. Радуйся, Трифоне,  
скорый помощниче всем, с ве-  
рою и любовью к тебе прите-  
кающим.

### *Кондак 10*

Услышав тя глаголавша, яко не  
исповедующих истинныя, право-  
славныя веры жребий есть огонь  
неугасимый, зело разгневался Ак-  
вилин и повеле тя, святой Трифо-  
не, повесив, бити; ты же, в повеле-  
нии сем услышав Господень глас,  
призывавший тя на страдальче-  
ский подвиг, возопил еси Богу:  
Аллилуиа.



## Икос 10

Яко свеща огнем возгарает-  
ся, тако душа твоя, святой Три-  
фоне, возгорется любовью к  
возлюбившему тя Богу, и, ус-  
лышав повеление игемона, еже  
на тя, сам совлекл еси ризы  
твоя и тело твое предал еси в  
руце мучителей, да сотворят  
вся, яже повеле игемон. Зряще  
таковую ревность твою по Бо-  
зе, вси вернии глаголаху: Ра-  
дуйся, с веселием уготовавый  
себе к приятию ран за Христа;  
радуйся, риз своих совлекийся  
ради обнаженного некогда за  
грехи наши Искупителя. Радуй-

ся, добровольно в руке мучителей себе предавый, Христу подражая; радуйся от них связанный и повешенный на мучение. Радуйся, приявый за Христа лютая ударения; радуйся, три часа терпевый нещадное биение. Радуйся, мучиму бывшу, ни единого стенания и ни единого гласа испустивый; радуйся, биения, узы, раны, опаления и иныя много-различныя страдания претерпевый. Радуйся, в молчании приявый ударения, от них же ранами изъязвися тело твое; радуйся, страданием своим силу Божию прославивый. Радуйся, терпением своим мучителей посрамивый;

радуйся, подвигом своим христиан возвеселивый. Радуйся, Трифоне, скорый помощниче всем, с верою и любовью к тебе притекающим.

### *Кондак 11*

Видеша терпение и подвиг твой, святой Трифоне, еще же и адамантову крепость твою, и прославиша предстоящие людие Подвигоположника Христа Бога песнию: Аллилуиа.

### *Икос 11*

Яко стену тверду и непоколебиму виде тя нечестивый судия, обаче не прослави Бога, даровавшего тебе крепость

сию, но паче тщаешься склонити  
тя и лестью и страхом смерти,  
да принесеши жертву бесовѣмъ.  
Ты же, святой мучениче, исповедав во ушю всех веру Христову, обличил еси безумие гонителей и показал еси мудрость тех, иже во Христа веруют; игемон же, измышляя на ты иная мучения, повеле тя со столпа сняти и, привязав к коню своему, влече за собою. Мы же потщимся прославити страдания твоя: Радуйся, уязвленный телом и за конем быстро влекомый; радуйся, хлад зимний претерпевый. Радуйся, научая нас в скорбех земных ум

свой к Богу устремляти; радуйся, наставляя в мире сем хладном согреватися любовью, яже к Богу. Радуйся, делом нам показуя, како подобает ни во чтоже вменяти скоропреходящая на земле страдания; радуйся, любви и милосердия ко всем людем исполненный. Радуйся, ради любви тоя за враги своя молитвы Богу возносивый; радуйся паки в темницу вверженный и в заточении лютом томление, муку и болезни претерпевый. Радуйся, ясно являющий, яко лютейшая страдания земная ничтоже суть, аще к Богу прибегают людие и Бога

ради терпят скорби и раны; радуйся, на усекновение главы твоея радостно шедый и пред усекновением тем в руке Бога твоего, Егоже ради вся лютая подъял еси, душу свою святую предавай. Радуйся, прежде усекновения моливыйся о всяком, иже воспоминати тя и в память твою святых жертвы приносить будет, да услышит его Господь и всякое прошение его исполнит; радуйся, по успешии твоём в видении повелевый погребсти́ тя во отечествии твоём, научая тем и нас свое отечество любить. Радуйся, Трифоне, скорый помощниче

всем, с верою и любовью к тебе притекающим.

### *Кондак 12*

Не токмо на земли, святой мучениче, был еси помощник и заступник всем, твоя помощи требующим, но и по смерти не престаеши избавляти от бед к тебе с верою и любовью притекающих, якоже избавил еси царского гнева боярина Трифона, егда внезапно явился ему на коне и дал еси ему отлетевшаго царского сокола. Оный же Трифон сокольник на месте сем, идеже ему от тебе помощь явися, во благодарение тебе за избавление свое воздвиже



святый храм во имя твое, мучениче Трифоне. Мы же благодеяния, от тебе бывшая, воспоминающе, возносим благодарственную Богу песнь: Аллилуиа.

### *Икос 12*

Поюще твоя многоразличная чудеса, твою дивную и скорую помощь, яко никогоже усердно прибегающего к тебе с верою, любовью и упованием никогдаже отринул еси, но всех к тебе притекающих и пред святою иконою твоею смиренно молящихся от внезапных бед и скорбей избавляеши, прочее время живота их во благо устрояеши,



недузи врачуеши, печали уто-  
ляеши и комуждо в бедах и  
скорбех к тебе припадающему  
помощь и ослабу даруеши, бла-  
годарне восхваляем тя сице: Ра-  
дуйся, наша моления и проше-  
ния приемляй; радуйся, за ны  
пред Престолом Божиим моля-  
щийся. Радуйся, от Бога милос-  
ти нам непрестанно просящий;  
радуйся, от нечаянных бед и  
зол непреложное наше избав-  
ление. Радуйся, от бед и напас-  
тей, движимых на ны грех ради  
наших, скорое прибежище; ра-  
дуйся, многия слезы, от скорби  
проливаемые, изсушивый. Радуй-  
ся, многия печали утоливый;

радуйся, яко никтоже припадый к святей иконе твоей тощ от нея отъиде. Радуйся, всякаго притекающаго к тебе под кров свой и заступление приемляй; радуйся, здравия требующим скорое исцеление. Радуйся, оставленных врачами и ради неисцельных и тяжких недугов своих чающих себе смерти, скорое и безмездное врачевание; радуйся, и ныне, якоже и древле, живу ти сущу, неизсякаемый источниче неизчетных и многообразных чудотворений. Радуйся, Трифоне, скорый помощниче всем, с верою и любовию к тебе притекающим.

### *Кондак 13*

О святыи мучениче Трифоне!  
Приими сие малое, обаче от лю-  
бящих и благодарных сердец  
приносимое тебе наше моление,  
вознеси ко Господу Богу теплыя  
молитвы твоя за ны, недостой-  
ныя: болящия исцели, печаль-  
ныя утѣши, заблуждшия вразу-  
ми, бедствующим помози, и вся  
нам потребная для здравия те-  
леснаго и спасения душевнаго у  
Бога Щедродавца испроси, наи-  
паче же избави нас от лукавых  
бесов, да памятуя выну твоя див-  
ная о нас заступления, просла-  
вим Бога, даровавшаго нам тако-  
ваго молитвенника, целителя и

чудотворца, воспевающе песнь:  
Аллилуиа.

(Этот кондак читается  
трижды, затем 1-й икос: «Об-  
разу благочестия родителей...»  
и 1-й кондак: «Избранный от  
Бога...»).

*Молитва святому мученику  
Трифону*

О святыи мучениче Христов  
Трифоне, скорый помощниче и  
всем к тебе прибегающим и мо-  
лящимся пред святым твоим об-  
разом скоропослушный предста-  
телю! Услыши ныне и на всякий  
час моление нас, недостойных

рабов твоих, почитающих святую память твою во всечестнем храме сем, и предстательствуй о нас пред Господом на всяком месте. Ты бо, угодниче Христов, в великих чудесех возсиявый, источаяй цельбы притекающим к тебе с верою и сущия в скорбех человеки заступаяй, сам обещался еси прежде исхода твоего от жития сего тленнаго молиться за ны ко Господу и испросил еси у Него дар сей: аще кто в какой-либо нужде, печали и болезни душевной или телесной призывати начнет святое имя твое, той да избавлен будет от всякаго прилога злаго. И якоже ты иногда дочь

цареву, в Риме граде от диавола мучиму, исцелил еси, сице и нас от лютых его козней сохрани во вся дни живота нашего, наипаче же в день последняго нашего издыхания предстательствуй о нас. Буди нам тогда помощник и скорый прогонитель лукавых духов, и к Царствию Небесному предводитель. И идеже ты ныне предстоиши с лики святых у Престола Божия, моли Господа, да сподобит и нас причастники быти присносущнаго веселия и радости, да с тобою купно прославляем Отца и Сына и Святаго Утешителя Духа во веки. Аминь.



## ЖИТИЕ СВЯТОГО МУЧЕНИКА ТРИФОНА

Святой мученик Трифон родился в одной из областей Малой Азии — Фригии, неподалеку от города Апамеи в селении Кампсада.

С юных лет Господь даровал ему силу изгнания бесов и исцеления различных болезней.



Однажды жители его родного села были спасены им от голода: святой Трифон силой своей молитвы заставил уйти вредных насекомых, истреблявших хлебные злаки и опустошавших поля.

Особенно прославился святой Трифон изгнанием беса из дочери римского императора Гордиана (238—244).

Помогая всем страждущим, он требовал только одной платы — веры в Иисуса Христа, благодатью Которого он исцелял их.

Когда на царский престол вступил император Декий (249—251), жестокий гонитель христиан, епарху Акилину было донесено, что святой Трифон смело



проповедует веру во Христа и многих приводит ко Крещению. Святой был схвачен и приведен на допрос, во время которого он безбоязненно исповедал свою веру. Его подвергли жестоким истязаниям: били палками, терзали тело железными крючьями, обжигали раны огнем, водили по городу, вбив в ноги железные гвозди. Все пытки святой Трифон мужественно претерпевал, не издавая ни единого стона. Наконец, он был осужден на усечение мечом. Перед казнью святой мученик молился, благодаря Бога, подкрепившего его в страданиях, и испросил у Господа особую благодать тем, кто будет призывать его имя на

помощь. Прежде, чем воины занесли меч над головой святого мученика, он предал душу свою в руки Божии. Это событие произошло в городе Никее в 250 году. Святое тело мученика христиане обвинили чистыми пеленами и хотели предать погребению в городе Никее, в которой он пострадал, но святой Трифон, в видении, повелел перенести его тело на свою родину в селение Кампсаду. Это и было исполнено.

Впоследствии мощи святого Трифона были перенесены в Константинополь, а затем в Рим.

Большим почитанием пользуется святой мученик в Русской Православной Церкви.

Существует предание, что при царе Иоанне Грозном во время царской охоты улетел любимый царем кречет. Царь приказал сокольнику Трифону Патрикееву найти улетевшую птицу. Сокольник Трифон объехал окрестные леса, но безуспешно. На третий день, утомленный долгими поисками, он остановился под Москвой, в месте, ныне называемом Марьино роццо, и в изнеможении прилег отдохнуть, усердно помолившись перед этим своему святому покровителю — мученику Трифону, прося его о помощи. Во сне он увидел юношу на белом коне, державшего на руке царского кречета, и этот юноша произнес: «Возьми пропавшую птицу, поез-

жай с Богом к царю и ни о чем не печалься». Проснувшись, сокольник действительно увидел неподалеку на сосне кречета. Он тут же отвез его к царю и рассказал о чудесной помощи, полученной им от святого мученика Трифона. Через некоторое время на том месте, где было явление святого, сокольник Трифон Патрикеев построил часовню, а затем и церковь во имя святого мученика Трифона.

Мученику Трифону особо молятся об исцелении от телесных недугов, в болезненном состоянии, в случаях порчи плодов, во время голода.

Память мученику Трифону совершается 1/14 февраля.







